

工部則例



工部則例

都水清吏司

橋道

一橋梁道路。都城內外。通禁城大街。凡十有六坊。二十有三。護城橋十有五。

御河橋十。水陸大小橋梁。共三百有七十。○順治元年定。凡直省橋道。令地方各官以時修理。若橋梁不堅完。道路不平坦。及津要處所。應置橋梁而不置者。均交部分別議處。○又議準。京師街道。差本部漢司官一人專管。仍令五城司坊



官分理。凡在京內外街道。若有作踐。掘成坑坎。蓋房侵占。或傍城使車。撒放牲口。損壞城脚。及大清門前

御道。

正陽橋及各門月城等處。作踐損壞者。交刑部治罪。○康熙二年覆準。內城街道。令滿漢御史。街道廳。步軍總尉。副尉管理。外城。令街道廳。五城司坊官管理。○三年覆準。街道分左右翼。差本部滿漢司官各二人管理。○十四年覆準。內城街道。交步軍統領。外城。交街道廳分理。○四十

三年奉

旨。街道。交步軍統領專管。○四十七年奉

旨。著給事中兼管街道。○五十年奉

旨。凡一應舊有瓦房偏廈。侵占街道者。暫免拆毀。俟蓋造時清出。○又議準。正陽門外東西兩邊房屋。并珠市口民房。以新溝為限。準其修理蓋造。至小街有溝者。以溝為限。無溝及街道原係參差不整。或一面係空地者。均以左右鄰房不占官街者為準。仍將該戶礙道尺寸報部備案。日後更造。清出還官。○五十二年覆準。監督街道。仍

差本部滿漢司官各一人。定限一年更替。○雍正二年

諭。九門石路損壞。行走維艱。交工部。步軍統領。公同詳勘。將應修補之處確估。以次修理。再西直門外石路。修至高梁橋。暢春園石路有損壞者。亦著修理。此工著動內庫銀。欽此。○又

諭。聞前三門外溝渠壅塞。人家存水。街道泥濘。行路艱難。如有積水之處。作何疏通。毋使居民受累。步軍統領察明奏聞。著該城監察御史。街道廳。營弁會同料估。啟奏。動用正項錢糧修理。如有騎溝大房。著拆毀。

賞銀以償其費。欽此。○又覆準。

皇城一帶地方。禁止當街污穢。曬晾皮張。○三年
諭。廣寧門外大路低窪。大雨時行。則積水處。車輛行李
往來甚難。著步軍統領。支部庫銀修理石路。欽此。○
又

諭。直隸總督。今年六月以後。雨水較多。橋梁道路。多被
淹沒。京師為四方輻輳之地。士民商賈。往來雲集。今
聞近京各處。道途積滯。行李維艱。諸物騰貴。朕心深
為軫念。爾可轉飭各地方官。悉心籌畫。其大路中集
水之處。作何疏洩。窪圯之處。作何修墊。通州一路。可

交與通水道副將。古北口一路。可交與提督及該管州縣官。宣府一路。可交與總兵及該管州縣官。近京一帶。可交與大興宛平良鄉涿州等州縣。速令相度地勢。設法修理。使行旅無阻。不可借端科派。以便民之政。轉致累民。欽此。○又

諭。御史條奏道路甚高。相應劄據。將劄出之土。止住空車。只裝半載。出城不費錢糧等語。若攔止空車。趕車之人必怨。怨則進城之車少。進城之車少。凡物價貴。與生民無益。見今京城禁止成造土坯。此土情願取去。成造土坯。及填墊院基溝渠者。聽其取用。餘土亦

著動正項錢糧。豈可勞衆。欽此。○又

諭。新修九門石路。有被重車壓陷者。著即修理。嗣後日久。再有車壓塌陷處。步軍統領由部支領錢糧修理。欽此。○又議準。

紫禁城週圍

御河街道。有堆積處。悉行禁止。嗣後仍令步軍統領清理。並於左右兩翼內。委所屬官弁。不時巡察。○四年奏準。通州牛欄山昌平州道路。交地方官察看。遇有低窪。隨時修整。○六年奏準。京倉運道。一律修整石路。工竣令保固三年。○又

奏準。察勘石路。自廣寧門外至小井村。土道。自右安門外至草橋南。並夾石路之護土釘笆。悉令平坦堅固。工竣。保固三年。○七年

諭。正陽門外天橋至永定門一路。甚是低窪。此係人馬往來通衢。若不修理。一遇大雨。人難行走。至廣渠門內之路。亦著一并察勘具奏。欽此。遵

旨。察勘廣渠門道路甚好。毋庸修理。左安門道路微窪。交街道廳。將剗掘街道附近所起之土。運往鋪墊。再天橋起至永定門外吊橋一帶道路。應改建石路。以圖經久。○又

諭。自朝陽門至通州京東大路。曾發錢糧修墊土道。今復壓壞。此道行人既多。且係京城大小官員支領俸米必由之路。著由朝陽門至通州大道。皆鋪墁石塊。酌量可容二車。兩旁土道。亦著修理平整。欽此。○又

諭。平治道路。王政所先。是以周禮有野廬合方之職。自四畿達之天下。掌其修治。俾車馬所至。咸蕩平坦。易津梁輻輳。行李通達。無雨雪羈滯之累。邇年以來。廣寧門外。已修石道。通州運糧之處。亦修整高潔。往來行人。頗為便利。今直隸至江南大道。車輪馬跡。踐壓歲久。致通衢竟成溝塹。兩旁之土。高出如谷。一遇雨

水。眾流滙歸。積勞難退。行人每苦泥濘。或至守候時日。朕心深為軫念。但此通行大道。久成窪下。勢難培築增高。而道旁高阜甚多。若於大道相近之處。別開一道。工力似屬易施。其間或有地形斷續。應修建橋梁。或溝塍淤積。應疏濬水道。或所開之徑。有借用民田者。應補給價值。並除錢糧。或繞行之路。有遠隔邱莊旅舍者。應引歸故道。使有頓宿。特遣大員。於今年夏秋之交。自京師起程。由良鄉至宿遷大道。一路踏勘。將作何別開新道。詳悉議定。估計工費。繪圖呈覽。欽此。遵

旨。察勘直隸山東江南三省道路。自宛平縣長新店至景州劉智廟。應修道路長五萬五百五十丈。修建橋梁四十八座。自劉智廟至郟城紅花埠驛。應修道路長四萬二千十有九丈。修建橋梁九十四座。自宿遷桃源至清河縣王家營。應修道路長萬一千八百十有二丈。修建橋梁二十一座。並責令該州縣。於道旁補栽柳樹。春秋親往察勘。奉

旨。工部即行文三省。動正項錢糧。乘此農隙之時。委官作速興工。務於明春雨前告竣。仍差官往勘。其修

過橋梁道路。交該地方官隨時修整。并令新舊交代。永著為例。○又題準。黔省通滇大路。陡窄紆盤。改由鎮寧州屬黃果樹岔而入。別闢新路。至普安州屬蒿子卡。歸於舊路。並修整花局。阿樂。郎岱。等處道路。開平斗郎箐。打鐵。簡古。等關。石龍。那貢。烈當。趕場。猪場。等坡。務令一律平坦。沿途河溝。各建大小木橋。西林一渡。置造渡船。安設六驛。均歸各該地方官管轄。○八年

諭。通州石路及兩旁培土。前已降旨交地方官。但恐伊等未必實心培墊。著工部每季委司官前往察勘。並

諭地方官知之。欽此。○又奏準。通州石路及兩旁培墊土道。交與地方官管理。令沿途保甲居民。隨時平整車轍。○又奏準。直隸山東江南三省道路。令各州縣補栽柳樹。以庇行旅。○又奏準。外城房屋坍塌者多。著五城御史。會同街道廳。驗勘。凡係舊房。見修者。令照舊地。不得侵占。○十年題準。蘆溝橋。琉璃河橋。兩邊雁翅。毋得搭蓋房屋。有礙行旅。○十一年

諭。由京師至江南道路。往來行旅繁多。朕於雍正七年。特遣大臣官員前往。督率地方官。修理平治。不惜帑

金。成功迅速。又令道旁種樹。以為行人憩息之所。此
時河東總督董率河南官員。種植培養。林木茂密。較
勝他省。經過之人。皆共見之。凡此道路樹木。皆朕降
旨交與地方官隨時留心保護者。近聞官吏怠忽。日
漸廢弛。低窪之處。每多積水。橋梁亦漸拆陷。車輛難
行。道旁所種柳株。殘闕未補。且有附近兵民砍伐為
薪者。此皆有司漫不經心。而大吏又不稽察訓戒之
故。著傳諭該督撫等。轉飭有司。照舊修理。務令平坦
整齊。或遇雨水泥潦。隨損隨修。不得遲緩。其應行補
種柳株之處。按時補種。并令文武官弁。禁約兵民。不

得任意戕害。倘有不遵。將官弁題參議處。兵民從重
治罪。欽此。○十二年覆準。川省南北兩路驛站。北路
之觀音碓。牛頭山。劍門關。五侯坡。南路之金雞
嶺。飛龍關。大關山。小關山。大相嶺。飛越嶺。金釵
碓。大胡梯。小胡梯等處。山路坍塌。應動項修整。
凡遇陡壁臨深之處。建造偏橋。增設扶欄。○十
三年

恩詔。各省要路橋梁。間有損壞。行人勞苦。著地方有
司。申報各督撫。奏明修理。○乾隆二年議準。京師
朝陽廣寧二門石道。交地方官三年一次察勘。

如有圯塌。報部修理。○三年

諭。川省遠在西陲。道路之難。甲於天下。其中棧道偏橋。更為險隘。每年資藉民力。隨時修補。未能一勞永逸。行旅艱辛。深可軫念。著四川巡撫。會同西安巡撫。委官確勘。將應行修理之處。分別南棧北棧。兩省分任修理。即動該省存公銀。以為工費。工竣之後。交地方官不時稽察。如遇暴雨大水。衝塌過多。仍準詳報。酌動公項修整。俾永遠堅固。以便行人。欽此。遵

旨。議修陝省棧道。自鳳翔府寶雞縣起。經漢中府。鳳襃城。沔寧。羗。等州縣。南接四川廣元縣界。綿長九百餘里。其咸寧縣棧道偏路。改由庫峪口。至舊縣關。鎮安縣舊縣關偏路棧道。改由關西折入西平峪。至舊司。川省棧道。自劍州起。至廣元昭化一帶。長四百二十餘里。凡遇山水相逼。紆折之處。隨勢開鑿。增寬偏路。偏橋。疊橋。砌路。增設木筏接渡。懸崖峭壁。大谷深淵。建築短牆。並設木欄保護。○六年題報。棧道工竣。令地方官不時巡察。其存剩各項鐵器。貯州縣庫內。以為歲修之用。遇地方官新舊交代。造入冊內。以專

責成。○十二年。奏修畿輔低窪道路。奉

旨。交地方官隨時辦理。○十五年

恩詔。各省要路橋梁有損壞者。著地方有司。申報該

督撫。動項修理。○十六年

恩詔同。○十九年

諭。五城街道泥土。歲久填積增高。行路居人。均屬不便。著管理河道溝渠大臣等。詳悉察勘。量其修理之費。動支官帑。堰去積土。堆置就近城外隙地。此番官辦後。隨時畚除。自易為力。并令該管衙門。酌照從前煤車回空。攜帶沙土之例。善為經理。勿仍

壅積。但不得任聽兵役。抑派滋擾。欽此。

一除道。康熙四十年題準。京城內墊道。交步軍

統領。城外。令宛大兩縣分理。○四十一年題準。

修橋墊道。著動用道庫雜項錢糧。報明戶部。會

同本部覈銷。○五十五年議準。

車駕行幸。沿途修墊銀。交扈蹕本部侍郎齎往。沿途給發。事竣奏銷。○五十六年題準。修墊營盤。大營每座。給夫八十名。頓營四十名。修墊道路。每里日給夫五名。每夫均日給銀六分。○乾隆元年

諭時際東作方興農事伊始毋得因朕謁
陵經過地方多覓人夫修墊道路致妨農業欽此○又
諭修理

泰陵道路著酌定一路修理毋得屢行改易以勞吾民
欽此○六年

諭哨鹿經由之路皆係

皇祖所行舊路朕今年前往所由道路橋梁皆著畧為
修理俾可行足矣斷不可妄挾地方田畝擾累黎
民至沿途所有行營如院宇墻垣有倒壞之處不
必令工部官修理著勘明交內務府總管修理欽

此○八年奏準修墊道路每里日給夫五名之
外加增二名大營每座八十名頓營每座四十
名各加倍給夫○十一年議定西峯口一帶道
路以山頂分界南屬薊州北屬遵化自山北至
昭西陵二撥紅椿一帶道路安設柵欄歸石門工部經
理○十四年奏準直隸所屬修墊道路諸費統
於司庫存公耗羨銀內動用報銷由部委官前
往監修之處一概停止○十六年奏準

巡幸未經

駐蹕其大營頓營地基經嚮導大臣奏明指辦者皆

令具文報部。準其覈銷。○十八年奉

旨。嗣後有水之河搭橋。乾河不必搭蓋。○又

諭。朕巡幸經過地方。所有道路橋梁。自應照例辦理。至道旁茶棚一項。隨從官員。原無暇憇息。徒供僕隸人等蹂躪作踐。而地方官又多此一番預備。甚屬無謂。著停止。欽此。○又奏準。每次

巡幸供帳什物。均由京中置備。齎往應用。其由地方官備辦。如大營頓營。動用席片木椽等物。亦皆動支公帑辦理。但存一取用名色。即啟將來借端訛索濫應冒銷之漸。應全行裁革。嗣後令該

管處大臣。先期詳定應用物件數目。由京置備齎往。如閱時既久。必須增補者。呈報總理行營大臣。奏

聞辦理。○又奏準。大營盤每座。新修地面。給夫百八十名。舊地。九十名。頓營盤每座。新修地面。給夫百名。舊地。五十名。修墊道路。開荒。每里給夫四十名。熟道。三十名。

一

御道種樹。雍正二年奉

旨。自西直門德勝門至暢春園。沿途皆著種柳。岔道亦

著栽種。皆著動用錢糧。栽完樹木。令人看守。遵

旨議準。令西北二城。宛大兩縣。各該地方。分為四段看守。○三年奏準。種樹令保活三年。如三年內有枯焦者。原種樹官補種。如各該地方官不敬謹看守。以致樹木被人折壞。牲口嚙傷。及偷盜者。並令各該地方官補種。○四年定額。西直門至暢春園。栽柳九千二百九十七株。德勝門至娘娘廟。栽柳三千二百三十四株。○六年

諭。沿途所植樹木。已閱四五年矣。看來不甚茂盛。此皆草率所致。圓明園正陽門前樹木。係敬謹種植。甚覺

整齊茂盛。向例道旁樹木。有乾枯者。令補種。近日竟不補種。朕所經由之路。尚且如此。則他處僻路可知。著內務府。工部堂官。五城官員。察奏。欽此。遵

旨議定。西直門德勝門至

暢春園一帶。沿途柳樹枯焦損失。著落原種樹及看守各官。限一月內。照數補栽。嗣後令五日澆灌一次。如逾限不完。即指名題參。其應賠種樹官內。有不能賠補者。均著落本部堂司官賠種。種後。西直門外石路。交西城。西直門外西道。交大興縣。西直門外東道。交宛平縣。德勝門外一

帶。交北城。各令人看守。本部仍會同內務府。步軍統領。順天府。巡察。遇有枯焦損失。即令補種。違者指叅。○又定。種樹價值。每株給銀一錢。○八年議準。栽樹高一丈二尺。徑二寸五分。栽深二尺。清明栽完。五日澆灌一次。根下用聚茨圍護。○十年

諭。圓明園石路兩旁樹木。應加謹培植。曾屢降諭旨。何以種植年久。仍然細小。皆由所司疎忽所致。此項樹木。或係內務府。或係工部種植之處。著察奏。欽此。遵旨。察勘。清楚。寺至

圓明園柳樹。係內務府種植。西直門至清楚寺石道兩旁。并各岔道柳樹。係本部委官承種。嗣後應補樹株。不準各官自行補種。一面勒追樹價。一面別行委官栽種。

一柵欄。順治元年定。京城內外大小衢巷。設立護門柵欄。有作踐損壞者。交刑部治罪。○雍正七年議準。外城柵欄。共四百四十座。均責令兵丁看守。以時啟閉。○乾隆四年覆準。外城柵欄。遇有損壞。由三營將弁。呈報步軍統領。步軍統領移咨到部。令街道廳察勘估報。委官修理。○

九年覆準。內城柵欄。嚴禁該管旗分科派捐修。應修造者。照外城例。令該管旗員。呈報步軍統領。咨部動帑辦理。○十五年覆準。外城柵欄四百四十座。內有兩旁房屋倒塌。無從依靠。毋庸修理者二十九座。○十八年覆準。內城柵欄共千有一百九十九座。皇城內柵欄百十有六座。

一溝道。順治元年定。令街道廳管理京城內外溝濠。以時疏濬。若有旗民人等。於塞溝道者。送刑部治罪。○康熙四十二年奉

旨。京城內外溝道。著步軍統領監理。○雍正四年奏準。

京城內外大小溝濠。內城。交步軍統領。分委八旗步軍副尉。外城。交五城街道廳。分委司坊各官。凡應行創堰之處。丈量確估。酌動正項錢糧。於次年興工。○五年議準。創堰京城內外大小溝濠。例應募夫。內城。照步軍修官工例。每夫日給制錢六十文。外城。照奉宸苑創堰內外河工例。每夫日給制錢八十文。由部給發。○又定。創堰

紫禁城內各處水溝。每創蓋石四十塊。用匠一工。

○七年奏準。自何家莊至左安門水關明溝。每年淤塞。不能暢流。交街道廳五城司坊官。將何家莊以下明溝千二百餘丈。開至面寬八尺。深五尺。直抵水關。每年濬淤。掘淺。不使壅塞。○又覆準。內城過街溝道。令坊官雇夫。刨掘。外城溝道。著街道廳。令居民自行刨掘。禁止溝頭包攬。毋得濫派。○八年議定。刨掘過街溝渠。折土見方五尺。給夫一名。○乾隆七年

諭。京城內外水道。甚有關係。年來但值雨水稍驟。街道便至積水。消洩遲緩。此水道淤墊之故也。向來

城內原有泡子河等水櫃數處。以資容納。而城外各護城河道。原以疏達眾流。使不停蓄。今日久未經修濬。皆多淤墊。而街道溝渠。亦多阻塞。以致偶逢霖雨。便不暢流。此亦應及時籌畫者。著戶部工部尚書。步軍統領。帶同欽天監官。逐一相度。其應如何疏濬之處。詳議請旨。欽此。遵

旨。察勘京城內外護城河。並城內各河。及青龍橋至高梁橋一帶河道。應按舊址疏濬。至於眾水經由各插口。及蓄水四庫。泡子河。太平湖等處。應以次疏濬。城內象房橋。大石橋。並朝陽門等處

露明溝渠。應行估修。城外天橋東西及牛街。驕子衚衕等處板溝。應改砌甃溝。九門大街溝渠。甚多。應詳細註冊。分年修理。小街溝渠。照舊例開濬。倍加深通。至各倉水道。並各部院洩水溝渠。令一并疏濬。○十八年奏準。護城河及雷廟口等處溝濠疏濬事宜。交步軍統領衙門辦理。○又奏準。嗣後外城溝道。有應行剗堰者。令該處司坊官。呈報步軍統領衙門。一并辦理。

